

# Sessiun da giuvenils: Scleriments davart la tariffa da notg en il traffic public

■ (cc) La regenza è sa fatschentada cun las petiziuns ch'èn vegnidas inoltradas da la sessiun dals giuvenils dal Grischun il matg 2013. Las petiziuns deliberadas dals giuvenils han tractà differents temas per concepir la convivenza ed il futur dal Grischun.

En ina petiziun davart il servetsch public vegn la regenza supplitgada da s'engaschar per l'aboliziun da la tariffa da notg en il traffic public dal chantun Grischun. Or dal puntg da vista da la regenza na manass quai betg a la finamira perquai ch'il chantun vuless offrir er en l'avegnir ina purschida da notg attractiva. La regenza è però pronta da laschar calcular ils custs che resultan

sch'il chantun finanziaess eventualmain il supplement da notg sco er da laschar examinar ulteriuras pussaivladads da finanziaziun. Pussaivlas pudessan per exempel esser variantas «finanziadas parzialmain» sco tariffas unitaras analogamain a l'aglomeraziun da Turitg u er in sponsoring dals supplements da notg tras interpresas sco soluziun da gudogn per tuttas duas varts. Las cartas da client da questas interpresas dessian il dretg da viagiar libramain en la rait da notg, quai che pudess la finala er gidar ad augmentar l'attractividad da las atgnas purschidas da questas interpresas en il segment da marketing che duai svegliar l'interess dals giuvenils.